

- Յետոյ դու կարո՞ղ ես մենակ ետ դառնալ:
- Ես գիշերն ել չեմ վախենում, երբ սարերի վերա մենակ ման եմ գալիս, – պատասխանեց նա ժպտալով:
- Բայց ինձ այն ասա՛, նրանք ձիո՞վ գնացին:
- Չէ՛, ոտով:
- Ես ինչո՞ւ չեմ գնում ոտով: Մըհե, ինձ պետք չէ:
- Ձի՛ն պետք չէ՛... – կրկնեց վիթխարին, դժդոհութեամբ իմ երեսին նայելով: – Էդ պետք էր առաջ փիթր անել եւ սատանայի տանջանք չտալ մարդուն...:
- Նա զի՞ժ է, ի՞նչ է, – հարցրի Մարոյից, երբ ծառան հեռացաւ:
- Նա շատ լաւ մարդ է, բայց կը տրաքոի, թէ մի բանի վրայ չխօսայ, երբ նրան դուր չէ գալիս:

Մի նեղ շաւիղ, որ տանում էր դէպի Ծակ-քարը, ոլոր-մոլոր պտոյտներով անցնում էր բլուրների միջով, անդադար դէպի վեր բարձրանալով եւ դէպի վայր իջնելով: Մարօն հազած ուներ մի պարզ, խայտաճամուկ զգեստ, որը կարելի էր տեսնել քուրդ հովուհիների հագին: Նրա սեւ գանգուրները գեղեցիկ կերպով ծածանւում էին բարակ քամուց, որ փչում էր ծովակից: Ամենահամարձակ այծեամս այնպէս թեթեւ, այնպէս յանդուգն չէր կարող թռչել այն քարաժայռերի միջով, որպէս Մարօն: Լեռնային օդը եւ շտապ ճանապարհորդութիւնը ազդեցին մանուկ օրիորդի երեսի վրայ, եւ նրա արեւից այրոած թուխ-թաւիշեայ թշերը ստացան մուգ-վարդագոյն պայծառութիւն:

Ես բոլորովին հիացած էի այն կիսավայրենի լեռնաբնակի սիրուն եւ վայելուչ կազմածքով, որ այնքան առածգական էր եւ թեթուն: Ես երբեք երեսակայել չեմ կարող այնպիսի գեղեցիկ աչքեր, մե՛ծ սեւորակ աչքեր, հովանաւորած խիտ թերթերունքով, այնպիսի գեղագրական յօնքեր, որոնք միանում էին խոտորնակի գծերով: Որքա՛ն ինքնավստահութիւն կար նրա համարձակ շարժածքների մեջ. որքա՛ն կեանք կար այն բնութեան ազատ եւ հաւատարիմ զաւակի մեջ...: Ես իմ մտքում նրան համեմատում էի գեղեցիկ Սոնայի հետ, որի ամեն մի գծերից արտայայտւում էր ընտանեկան բռնութիւնից ճնշոած եւ տանջոած աղջկայ երկչոտ-ամօթխածութիւնը... Մե՛ծ տարբերութիւն...:

Մի տեղ, ճանապարհի կողքին, կուտակոած էր փոքրիկ բլուր, որ բաղկանում էր քարերի մանր կտորներից. հասնելով այնտեղ, Մարօն առեց գետնից մի քար եւ նետեց նոյն բլուրի վրայ: Ես հարցրի այս խորհրդական գործողութեան պատճառը: Նա պատասխանեց, թէ այս բլուրին ասում են «Մի-